

# JUD

## Jud Gigungum Meuma

---

<sup>1</sup> <sup>a</sup>Jud me Iesu Keriso nauwawa eniwa sira Jemus gwaneba, gigungum mame teeni, iyayapan mu Mamanwa God auwanewa sira baigan meuma muniviwa sira Iesu Keriso oya amaraiviwa munan.

<sup>2</sup> Ne imunap God ano yemivi sira yum ge baigan obiren guniyap wakeigimpe.

### God Den Anotumat Eme Igiyawa Kukaeba Mumawa

<sup>3</sup> Iyayapan neuma. Ne yenan gigungum tetan yusipamit anona waita ye guniyap autuwa gaiyawa oya. God me iyakaisi igiyawa anotumat muma wait toyau munne koni desirom ge kum undag oya. Gare mame ne anoeniwa yenan gigungum tetanit di, kuiyawa ne imunap ye anotumat mame oya gare mut aya. <sup>4</sup> <sup>b</sup>Kuiyawa iyayapan upeba guwawe uwag unigiya. Mu matai pui yuwampe. Watavit meib teya. Mu God den anotumat eme igiyawa, sira mu God ano oraiwa auwag tobieme kukaeba aivi. Mu Iesu Keriso topai eme. Me desiromiren namuyoiyoi abnawa numa sira desiromiren Ayapan numa.

<sup>5</sup> <sup>c</sup>Ne anoeni ye dividivi undag wait yaug anoyana, go ne anoeni mame sira wag diruitna. Namu Ayapan iyayapan meuma at Ejipt apa tam tene dauwag amiya, ivi anotumat den eme igiyawa wakukamunne. <sup>6</sup> <sup>d</sup>Sira Ayapan me aneya mu arowo den amat aya sira tam itan tene mu arowo di wakepono sisip danave te munne. Me mu sisip danave evedni wakeiviwa gumbe tune aipe kum kokavitwa kep tete kumive. <sup>7</sup> <sup>e</sup>Desiroma mina, Sodom ge Gomora ge gwetoimu birerot wakeyawa, mu yaibobot iyameba gumbe garawa kukaeba auya. Kuiyawa mu gaibu uinantaraki aya sira kwapiwa gumbe anoano kukaeba anog didimama eme. Mame guwaguwawa ane me iyayapan kukaimusiawa garawa kukaeba matai autanwa toyau nuntan oya.

---

<sup>a</sup> 1 Mat 13:55   <sup>b</sup> 4 Gar 2:4; 2Pi 2:1   <sup>c</sup> 5 Eks 12:51; Nam 14:29-30   <sup>d</sup> 6 2Pi 2:4  
<sup>e</sup> 7 Gen 19:1-25; 2Pi 2:6,10

<sup>8</sup>Sira desiroma mina, uyavi igiyawa mu mumbo kwapuwa miyot eme, sira yusipama abnawa topaieme, sira God waribiya munnewa gumbo anokukam gumbo ag dirumeme. <sup>9</sup>Namuyoiyoi aneyaeba Maikeru me Seitan gaibu Mosisi kwapiwa oya gae wag garadi eme. Me kumiwa apa, Maikeru gae yusipam den dine pui yutan oya. Megara me wane, “Ne imunap Ayapan ge toyau gempe.” <sup>10</sup><sup>g</sup>Megara iyayapan mame mu den yaug anoemewa gumbe gae yusipam veme. Mu anoano yaug anoya bui uwan mina mu meib di, sira anoano meiba gumbe mu mumbo matai watkukampe.

<sup>11</sup><sup>h</sup>Me kukaeba koka mu gumbo. Mu Kein ebuwawa amiya, sira garawa autan oya Baram gwambe anewa mina mu gwambe desirom aya, sira Kora mina garadi muma gumbe watkukamiya.

<sup>12</sup><sup>i</sup>Baigan buyunai yeuma danave mu miyot. Mu buyunai ye gaibu aya, go mu nonowa mokona onan mu mukut nag amareme. Mu irikup yoi gaibu onanwa me taig aug aiviwa. Sira mu maura yomaeba toyainewa me natawa onan sira taiwa gaibu biyauya. <sup>13</sup>Mu poeman yawarat kokavit mina. Mu ubmam muma agoniyag dumemewa. Sira mu marantun me ipunapun eme. Sisip muma evedni wakeigimpe oieba onan.

<sup>14</sup><sup>j</sup>Enok wakene. Adam gumbe onke Enok gumbe uwanewa, mu kum muma kumiwa 7. Enok me iyayapan mame oya watavit di wane, “Yauya Ayapan uwape iyakaisi igiyawa meuma obiren sira obiren egave gaibu. <sup>15</sup>Ayapan me iyayapan undag gumbo kepte mumpe. God namive inaiinai muma oraimina onan igiyawa mu God gumbe a den ag kukaeba eme, sira Ayapan gumbe gae kukaeba veme gwambe eme. Mu vemewa undag gumbo sira mu emewa undag gumbo Ayapan kepte mumpe.” <sup>16</sup>Mu kwavi igiyawa sira ae veme igiyawa. Mu imuwa kukaeba muma gumbe amome. Mu nouwa gae koukawa veme, sira iyayapan da degadegaeba veme garawa gumbo autan oya.

<sup>17</sup>Megara iyayapan neuma, ne imunap anoya gae Ayapan numa Iesu Keriso apasoro meumawa watavit wayawa. <sup>18</sup><sup>k</sup>Mu ye guniyap wayawa, “Kum oieba apa iyayapan mu iyagau ag ubmam yempewa uwape. Mu God namive inaiinai muma oraimina onan sira imuwa kukaeba gumbe amome igiyawa.” <sup>19</sup>Iyayapan mame mu Guwawa gaibu onan, sira mumbo kep tepe, sira anoano muma gumbe ag amome igiyawa.

<sup>20</sup><sup>l</sup>Megara iyayapan neuma, ye yembovit sig wan yoiya anotumat yeuma iyakaisiyapama danave. Sira Guwawa Iyakaisiyapama gumbe nun waigimiya. <sup>21</sup>God baigan meuma danave wakeigimiya. Sira ye amaraya Ayapan numa Iesu Keriso ano yempe me inaiinai yaibobot yempewa.

<sup>f</sup> 9 Dan 10:13,21; 12:1; Jak 3:2; 2Pi 2:11; Rev 12:7    <sup>g</sup> 10 2Pi 2:12    <sup>h</sup> 11 Gen 4:7-8; Nam 16:1-35; 2Pi 2:15; 1Jn 3:12    <sup>i</sup> 12 2Pi 2:13,17    <sup>j</sup> 14 Gen 5:18,21-24    <sup>k</sup> 18 2Pi 3:3  
<sup>l</sup> 20 1Ko 2:7

<sup>22</sup>Bira pimpanmusiawa igiyawa gumbo ano muniya. <sup>23</sup><sup>m</sup>Sira iyam gumbe iyayapan upeba tam waita muniya. God gumbe a ag iyayapan upeba ano muniya. Topai aya gweb enbanwa muma gaibu me kwapuwa gumbo gwagwap yaiyawa.

<sup>24</sup>God oma ane uyug gumbe amara yempe. Sira me oma ane waita yempe eyawa meuma namive wan yoiya degadega kokavit gaibu miyot gaibu onan. <sup>25</sup><sup>n</sup>Me God desiromiren sira Waita Abnawa desiromirenwa. God mame gumbe Ayapan numa Iesu Keriso gumbe eyawa, kokavitwa, yusiwa ge ano yusipam mu kum namuwa undag, gare mame kumiwa undag sira kum ivi evedni wakeigimpe oieba onan. Amen.

---

<sup>m</sup> 23 Jak 3:2; Rev 3:4    <sup>n</sup> 25 Rom 16:27; 2Pi 3:18